

ԳԼԽԱՎՈՐ ԽՄԲԱԳՐԻ ՍՅՈՒՆԱԿ

Սիրելի՛ ընթերցող

Հայկական գրադարանային ասոցիացիան ընթերցողի սեղանին է դնում «Լրատու Հայկական գրադարանային ասոցիացիայի» գիտա-տեղեկատվական հանդեսի 2024 թ. առաջին համարը:

Սույն համարում հոդվածները ներկայացնում ենք «Տեսություն և պրակտիկա», «21-րդ դարի գրադարան», «Մշակութային ժառանգություն», «Մարզային և համայնքային գրադարաններ», «Մատենագիտական ճշգրտումներ», «Գրադարանային իրադարձություններ» խորագրերի ներքո:

Հավատարիմ ամսագրի որդեգրած քաղաքականությանը՝ ամսագրում ներառված հոդվածները լավագույնս արտացոլում են ոլորտի ձեռքբերումներն ու խնդիրները, ինչպես նաև մարտահրավերները, որոնց բախվում են գրադարաններն իրենց ամենօրյա գործունեության ընթացքում: Տեղեկատվական տեխնոլոգիաները, որոնք արդեն վաղուց մուտք են գործել գրադարաններ, շարունակում են զարգանալ՝ առաջարկելով նոր գործիքներ, որոնց կիրառումն առավել դյուրին կդարձնի աշխատանքը: Մեր ուշադրության կենտրոնում այդ գործիքակազմի ներկայացումն է, քանի որ յուրաքանչյուր գրադարանավար օգտագործում է այն ամենօրյա աշխատանքի ընթացքում:

21-րդ դարում խիստ կարևորվում են կայքէջերն ու սոցիալական հարթակները, որոնք միջոցներ են՝ գրադարանների ձեռքբերումները հանրահռչակելու համար: Սոցիալական հարթակների հետ աշխատանքը պահանջում է առանձին հմտություններ և ունակություններ, որոնց պետք է տիրապետեն բոլոր գրադարանավարները:

ԼՐԱՏՈՒ ՀԱՅԿԱԿԱՆ ԳՐԱԴԱՐԱՆԱՅԻՆ ԱՍՈՑԻԱՑԻԱՅԻ

Ահա ինչու ամսագրում պարբերաբար անդրադառնում ենք այս թեմային:

ՀՀ մարզային և համայնքային գրադարանները միշտ ուշադրության կենտրոնում են: Նրանց նվիրված վերլուծությունները հրաշալի հարթակ են փորձի փոխանակման և նորությունները յուրացնելու տեսանկյունից:

Գրադարաններում պարբերաբար իրականացվում են մատենագիտական ճշգրտումներ, որոնց արդյունքում ի հայտ են գալիս տպագիր նոր անուններ կամ բացակա միավորներ: Հայերեն տպագիր ժառանգությանը նվիրված հետազոտությունները դառնում են միջոց՝ մշակութային արժեքները հանրայնացնելու համար: Մատենագիտական ձեռքբերումները վստահաբար ունեն սկզբնաղբյուրի արժեք և խիստ կարևոր են տարբեր գիտական ոլորտների մասնագետների համար:

Ներկայացնելով հանդեսի երրորդ համարը՝ ակնկալում ենք ստանալ մեր ընթերցողների և ոլորտի մասնագետների ակտիվ արձագանքները առաջադրված տեսակետների շուրջ: